



3. juni 2013

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Qaammat ataaseq qaangiuppoq Naalakkersuisunut ajornanngitsuarannguanik marlunnik apeqquteqaramali, paasiniarlugu inatsisit atuuttut naapertorlugit piumasarineqartut, toqqakkatut atorfiit atorfiillu allat attatiinnarsimanerlugit Naalakkersuisuni ilaasortat nalunaartussaataitanerat malinneqarismanersoq. Suna tunngaviuva Naalakkersuisut apeqqutinik sulii akisimannginnerannut?

(Inatsisartunut ilaasortaq Palle Christiansen, Demokraterne)

Naalakkersuisuni ilaasortaq, ivertinneqarnermini pisortanit toqqakkatut atorfeqaruni imaluunniit atorfeqaruni allamik, ilaasortaq taakkunanga atorfinnit tunuassaaq imaluunniit Qinigaanerup misilinnqarnissaanut Ataatsimiititaliamut erngiinnaq qinnuteqassaaq atorfiit tigummiinnarumallugit. Inatsisartut Naalakkersuisullu pillugit Inatsisartut inatsisaata § 25-ani tamanna takuneqarsinnaavoq.

Taamaattumik ulloq 30. april, Naalakkersuisut imaattunik apeqquteqarfigaakka:

1. Naalakkersuisuni ilaasortat sorliit Qinigaasinnaassuseq pillugu Ataatsimiititaliaq qinnuiginikuuat suliatik allat imaluunniit atorfitik allat ingerlatiinnarumallugit?
2. Naalakkersuisuni ilaasortat arlaat apeqqutip matuma tunniunnerata nalaani allanik suliaqarsimappat imaluunniit allanik atorfeqarsimappat, Qinigaasinnaassuseq pillugu Ataatsimiititaliamut tigummiinnarumallugu qinnutigisimanngisaminnik?

Taamani qaammat ataasingajak Naalakkersuisut nutaat atuutereerput, taamaattumik naatsorsuutigaara, Naalakkersuisuni ilaasortat toqqakkanut atorfeqartut imaluunniit allanik atorfeqartut, atorfimminnullu tigummiinnarusuttut, qangali Qinigaasinnaassuseq pillugu Ataatsimiititaliamut qinnuteqarsimassasut.

Neriussimagaluarpunga, taamatut naatsorsuuteqarnera Naalakkersuisut uppernarsarumaaraat.

§ 37 naapertorlugu apeqqutit sapinngisamik akineqartussaapput tiguneraniit ullut qulit qaangiutsinnagit. Maannakkut qaammat ingerlareerpoq, sulilu akineqanngilanga. Taamaattumik apeqqutigisariaqarpara Naalakkersuisut immikkut piffissarujussuaq atorlugu paasinaaqaartariaqarsimanerannut suna pissutaanersoq, paasiniarlugu naalakkersuisuni ilaasortat inatsisit atuuttut malissimaneraat imaluunniit aprilip naanera tikillugu toqqakkatut sulisimanersut imaluunniit allamik atorfeqarsimanersut, tigummiinnarumallugit Qinigaasinnaassuseq pillugu Ataatsimiititaliamut apeqqutiginngitsoorsimasaminnik. k



DEMOKRAATIT
DEMOKRATERNE